



PORTAVÓS VI GOVERNUN KONSTITUSIONÁL



KOMUNIKADU BA MEDIA

Loron 23 fulan-marsu tinan 2015
Dili, Timor-Leste

Timor-Leste hato'onia kondolénsia ba Lee Kuan Yew nia mate

Governu Timor-Leste simu ho laran-triste tebetebes notísia kona-ba Sua Exelénsia Señór Lee Kuan Yew nia mate, iha loron segunda, 23 fulan-marsu tinan 2015.

Lee Kuan Yew sai Primeiru-Ministru Sidade-Estadu ne'e nian durante tinan 31, no akompaña nia transformasaun husi sidade portuária ki'ik ida ba sentru komersiál internasionál no modernu ida. Foin lalais ne'e de'it maka Lee Kuan Yew rezigna an husi kargu Membru Parlamentu nian. Ninia vizaun ba Singapura no nia empenhu muda duni nasaun ne'e.

Governu hato'onia kondolénsia, liu-liu ba Lee Kuan Yew nia família no belun sira. Nia oan mane boot, Lee Hsien Loong maka dadaun ne'e nu'udar Primeiru-Ministru Singapura nian.

Iha karta ofisiál ida ne'ebé mak diriji ba Lee Hsein Loong, Primeiru-Ministru Timor-Leste, Dr. Rui Maria de Araújo hatete:

“Milagre Singapura nian oferese ba nasaun barak ne'ebé mak iha hela dezvoltamentu modelu progresu nian ida no símbolu esperansa no possibilidade nian ida. Timor-Leste sai hanesan nasaun ida husi nasaun lubuk ida ne'ebé haree ba Singapura ho admirasaun no hanesan ezemplu ida kona-ba buat ne'ebé bele alkansa liuhusi servisu maka'as, esforsu ne'ebé lahatene kole no iha kompromisu ida firme ba konstrusaun Estadu nian. Ida ne'e sei kontinua nu'udar legadu importante ba Sua Exelénsia”.

Iha Lee Kuan Yew nia lideransa mak estabesele ona lasu amizade ne'ebé metin entre Timor-Leste ho Singapura. Programa kooperasaun nian sira entre nasaun rua ne'ebé iha to'o oras ne'e haree liu ba formasaun no kapasitasaun, liu-liu iha Funsau Públika timor nian.

Portavós Governu Timor-Leste nian, Ministru Estadu Agio Pereira, hatete katak “ho Lee Kuan Yew nia mate ita asiste polítiku ida boot tebes nia mate, katak iha konviksaun pesoál ne'ebé halo tranzisaun ida ne'ebé hasai nia povu husi mukit, hodi transforma ninia nasaun no muda rejiaun ne'e ba nafatin”. **REMATA**



Ágio Pereira
+670 7723 0011
agio.pereira@cdm.gov.tl
govtlmedia@gmail.com
www.timor-lesite.gov.tl